

**Kerajaan akan tadbir Malaysia mengikut peraturan undang-undang, kata Mahathir**  
**AstroAwani**  
**05 Oktober 2019**

PETALING JAYA: Tun Dr Mahathir Mohamad pada Jumaat memberi jaminan kepada rakyat bahawa kerajaan akan mentadbir negara ini mengikut peraturan undang-undang dan bukan menurut beliau, yang berlandaskan undang-undang zalim seperti pentadbiran sebelum ini.

Perdana Menteri berkata, rakyat akan berasa selamat apabila kerajaan yang memerintah negara ini mengikut peraturan undang-undang.

"Undang-undang yang zalim menjadikan rakyat berasa amat tidak selamat kerana mereka boleh ditangkap dan ditahan tanpa perlu dibawa ke mahkamah undang-undang.

"Walaupun mereka (pentadbiran sebelum ini) menghapuskan undang-undang berkenaan, namun mereka gantikan dengan undang-undang lapuk yang lain.

"Namun kerajaan baharu akan memansuhkan undang-undang itu dan memperkenalkan undang-undang baharu.

"Malaysia perlu mempunyai undang-undang yang baik dan bukan undang-undang yang zalim," katanya pada Jumaat, semasa berucap pada pelancaran Persidangan Perlembagaan dan Peraturan Perundangan LAWASIA, yang pertama di sini.

Turut hadir, Peguam Negara, Tan Sri Tommy Thomas dan Presiden Majlis Peguam, Datuk Abdul Fareed Abdul Gafoor.

Dr Mahathir berkata, terdapat prosidur yang perlu dipatuhi bagi memperkenalkan undang-undang baharu yang akan menggantikan undang-undang zalim.

Kerajaan perlu mendapatkan majoriti dua pertiga dalam Parlimen untuk meminda Perlembagaan Persekutuan bagi menggantikan undang-undang zalim itu yang diwarisi daripada kerajaan sebelum ini, katanya.

"Terdapat prosedur yang (kita) perlu dijalani. Kita perlu mendapatkan majoriti dua pertiga untuk mengubah sebarang undang-undang yang memberi kesan kepada perlembagaan.

"Memandangkan tidak terdapat dua pertiga (majoriti), kita terikat dengan undang-undang lama, tiada majoriti untuk menukar undang-undang itu," jelas beliau.

Mengutarakan satu contoh, Dr Mahathir berkata apabila kerajaan berusaha untuk memansuhkan undang-undang anti-berita palsu untuk faedah rakyat pada September tahun lepas, beberapa ahli Parlimen tidak mempunyai pandangan dan fikiran yang sama.

"Kita perlu memansuhkan undang-undang yang lama dan zalim itu. Contohnya, anti-berita palsu, tetapi (kita) hanya mendapati sesetengah ahli dalam Dewan Rakyat tidak mahu dimansuhkan undang-undang berkenaan.

"Kita perlu menghentikan rakyat daripada memuatkan berita palsu dalam media sosial. Ia memberi kesan kepada kerajaan," katanya.

Dr Mahathir berkata, adalah penting kepada kerajaan untuk mengganti dan mengubah undang-undang zalim, terutama yang diperkenalkan sejak kemerdekaan dan kini sudah lapuk dan tidak relevan.

"Ia bukan hanya mengenai peraturan undang-undang sahaja, tetapi peraturan undang-undang yang baik. Kita mencapainya menerusi demokrasi, oleh orang yang mengundi yang mendukung idea peraturan undang-undang.

"Jika anda mempunyai orang yang sedemikian dan mereka mengepalai kerajaan tetapi mengabai atau menyalahguna undang-undang itu, ia amat tidak baik untuk negara.

"Anda boleh lihat daripada kerajaan sebelum ini yang menyokong dan meluluskan undang-undang zalim di Parlimen. Dan kini, kita berusaha untuk menguraikan undang-undang zalim ini tetapi bukanlah sesuatu yang mudah seperti kita fikirkan," katanya.

Perdana Menteri berkata, apabila Pakatan Harapan mengambil tampuk pemerintahan daripada Barisan Nasional, ia bukanlah hanya untuk menukar rejim sahaja tetapi juga menubuhkan sebuah pentadbiran yang lebih baik menggunakan pendekatan baharu termasuk peraturan undang-undang.

Dr Mahathir berkata, ini kerana rakyat menjangkakan perubahan cepat atau akan mengutuk kerajaan sekiranya ia gagal menunaikan janji pilihan raya umumnya.

Beliau mengakui bahawa memang senang untuk membuat janji pada pilihan raya umum tetapi bukan mudah untuk melaksanakan manifesto itu.

"Kami adalah mangsa terhadap manifesto kami. Kami akan mematuhi janji kami seboleh mungkin, tetapi ia bukan mudah," katanya.

**© 2019 AstroAwani Network Sdn. Bhd.**

**(535275-D) All Rights Reserved.**

Source: <http://www.astroawani.com/berita-malaysia/kerajaan-akan-tadbir-malaysia-mengikut-peraturan-undang-undang-kata-mahathir-219254>